



Inatsisartuni ilaasortaq Aleqa Hammond
(Siumut)

§ 37 naapertorlugu apeqqummut, nr. 2011-073-imut akissut, ALHA Innuttaasunik ataatsimiititsineq

Inatsisartut suleriaasianni § 37 naapertorlugu Inatsisartuni ilaasortaq Aleqa Hammond-ip (Siumut) innuttaasunik ataatsimiititsinerit pillugit matuma kingulianiittut Naalakkersuisunut apeqquteqaatigai:

Naalakkersuisunut apeqqut:

"Inatsisartuni UKA2009/148-ip oqaluuserineqarnerani Naalakkersuisut Inatsisartunut neriorsuutertik, tassalu quleqataq taanna pillugu innuttaasunik sineriammi oqallisigitinniarlugu neriorsuutini qaqugu piviusunngortinniarlugu iliuuseqarniarpat."

Tunngavilersuut:

"Isumaqarpunga Kuannersuit taassumalu periarfissai pillugit siammasissumik peqataatitsisumillu oqallinneq pisariaqarluinnarteq – aatsitassarsiornissamut isumaqataasut tusassallugit aammalu aatsitassarsiorsinnaanermut akerliusut isumaat tusassallugu oqallisigissallugulu."

Inatsisartuni UKA2009/148 "Kalaallit Nunaanni aatsitassap piarneqarsinnaasup suulluunniit uran-imik akuata 0,1%-mut qaffasinnerpaaffilerneqarnissaa piaarnerpaamik sulissutigeqqullugu Naalakkersuisut peqquneqarnissaannik Inatsisartut aalajangiiffigisaattut siunnersuut." oqaluuserinerani Naalakkersuisut Inatsisartunut neriorsuipput innuttaasut sineriammi apeqqummut tassungarpiaq isummersuutaat tusassallugu pingaaruteqarluinnarteq aammalu innuttaasunik oqaloqateqarnissaq pingaarluinnarteq.

Tamannarpiaq Siumup isumaqatigalugu siunnersuutip UKA2009/148-p kingusinnerusukkut aappassaaniigassanngortinniarlugu aaliangerpoq, pingaartut isumaqarfigigat-sigu innuttaasut qanoq oqariartuutissaat tusassallugu aammalu peqataaffigerusukkatsigu.

Maanna taamaallaat Naalakkersuisunit "oqallinneq illuatungiinnarsorteq" kisiat ingerlataat tassalu paasititsiniaaneq tusagassiutaannakkut qimallugu qaqugu innuttaasut isumaannik oqallitsitsinerlu ingerlanniarneraat apeqqutigaara."

Akissuteqaat:

Siusinnerusukkut § 36 naapertorlugu apeqqutigisarnut nr. 2010-120-imut innuttaasunik ataatsimiititsinerit qaqugu aamma sumi pissanersut pillugu akissuteqaatigisara inner-suussutigissavara:

"Ukiuni marlussunni kingullerni urani pillugu innuttaasunik arlaleriartumik ataatsimiititsereersimanerit eqqarsaatigalugit, naliliivunga suliap ingerlateqqinnerani innuttaasut peqataatinnissaannut, ataatsimiititsisarnernut nalinginnaasumik ileqqorineqartunut, amerlanertigut ikittuinnaat orniguffigisagaannut naleqqiullugu, sakkussat elektroniskiusut atoraanni tamanna sunnuteqarnerpaajussasoq. Taamaattumik ataani taaneqartunut naapertuuttumik paasititsiniaanermi periaaseq nalileqqinniarlugu aalajangersimavunga. Piffissatigut pilersaarutip aamma takutippaa, ukioq manna ukiup affaani siullermi tamanut ammasumik oqallinnernut tusarnaarnissaq pingaartissimagiga, tamatuma kingorna tunngaviusumik inassuteqaatinik saqqummiussinissaq siunertaralugu Naalakkersuisut sinnerlugit oqallinnernut

28. marts 2011
Sagsnr. 2011-047832
Dok. Nr. 590726

Postboks 930
3900 Nuuk
Tlf. (+299) 34 68 00
Fax (+299) 32 43 02
E-mail: bmp@nanoq.gl
www.nanoq.gl

akuliutinnginninni.”

Allakkami tassani aamma innuttaasunik ataatsimiititsinernut taarsiullugit paasitsitsiniaanermi ingerlanneqartussat pilersaarutigineqartut allassimapput:

a) Qaammarsaalluni paasitsiniaanissaq pilersaarutigineqarpoq, ilaatigut pissutsit assigiinngitsut aatsitassanik il.il. misissuineranut/piaaneranut attuumassuteqartut pillugit nassuiaasumik quppersakkamik naqiterititsisoqassalluni. Quppersakkap naqiterneqarnera 2010-imi aggustip qiteqqutereernerani naammassissasoq pilersaarutigineqarpoq. Quppersagaq sullissivinnit arlaannaannulluunniit attuumassuteqanngitsunit suliarineqassaaq, soorlu GEUS, DMU, RISØ, Strålehygiejnisk Institut allallu. Quppersagaq 2010-imi aggustimi saqqummersinneqarpoq aamma kommuninut, illoqarfinnut nassiuussuunneqarluni aammalu pissarsiarineqarsinnaalluni uani www.nanoq.gl.

b) Radiokkut/TV-kut aallakaatitassianik suliarinnittoqassaaq, immikkut ilisimasallit arlaannaannulluunniit attuumassuteqanngitsut aatsitassarsiornermik ingerlatsinermi, avatangiisinut sunniutaasartut il.il. inuiaqatigiinnik kalluaasussat pillugit nassuiaateqartartussaallutik. Radiokkut/TV-kut aallakaatitsinerni kattuffiit assigiinngitsut innuttaasullu peqataatinneqassapput, uran-imik piaanissamut isumaqataanertik akerliuvertilluunniit pillugu oqaaseqarnissaminut periarfissinneqassallutik. TV-kkut aallakaatitassiaq 2010-imi septembarimi aallakaatinneqarpoq aammalu 2011-imi martsimi aallaqaateqqinneqarluni.

c) Canadami naalagaaffiup ilaani uranimik piaanermik ingerlatsiviusumit ilisimasanik misilittakkanillu pissarsiaqarnissaq siunertaralugu Saskatchewan-imut Canada-miittumut paasisassarsiorluni angalanissaq Naalakkersuisut pilersaarutigisimavaat. Inatsisartut Inuussutissarsiornermut Avatangiisinullu Ataatsimiititaliaanni ilaasortat, Kommune Kujallermit politikkerit atorfilittallu attuumassuteqartut aamma Aatsitassanut Ikummatissanullu Pisortaqaarfik Naalakkersuisut qaaqqusimavaat. Tikeraarneq 2010-imi septembarimi pivoq aammalu angalanermit nalunaarusiaq pissarsiarineqarsinnaavoq uani www.nanoq.gl.

d) Radiokkut/TV-ikkut paasitsiniaanermut uiggiullugu annertunerusunik aqqis-suussisinnaaneq Naalakkersuisut misissorumavaat. Siumumiit siunnersuutip aap-passaanneerineqannginnerani Naalakkersuisut KNR-imi TV-ikkut oqallinnermi peqataassapput, tassani politikkerit, tapersersuisut akerliusullu urani pillugu oqallisissallutik aammalu innuttaasut apeqquteqarnissaat periarfissaqartinneqassalluni.

e) Suliassat ingerlanneqarnissaat pillugu aalajangiisoqannginnerani, innuttaasut aatsitassarsiornermik suliassani kaalluarneqartussat peqataatinneqarnissaat Naalakkersuisut qulakkeerniarpaat. Aatsitassarsiornermik suliassat assigiinngitsut siuariartornerat ilutigalugu innuttaasunik paasisutissiisarneq peqataatitsinerlu ingerlaavartumik ingerlanneqarpoq.


Tamatuma saniatigut eqqaasitsissutigissavara 2009-imi septembarimi Narsami urani pillugu innuttaasunik ataatsimiititsigama, taamatullu aamma Naalakkersuisut Siu-

littaasuat peqatigalugu 2010-imi juunimi Kujataani inuussutissarsiorneq sammillugu angalallunga, tassani pisortani oqartussat, sullissiviit suliffeqarfiillu ataatsimeeqatigineqarput. Angalanermi tassani siunertaavoq nunap ilaani tassani inuussutissarsior-tunik nukittorsaanissamut periarfissat pillugit suliassaqarfimmi soqutigisaqartunik oqaloqateqarnissaq. Ataatsimiinnerni qulequttat aatsitassanut aamma uranimut tunngassutillit oqallisigineqarput.

Uranimut suliassaqarfimmi paasititsiniaanerit arlallit ingerlassimasama allattorsimaffiat ilannguppara (ilanngussaq 1).

Naggasiutigalugu ilanngullugu oqaatigissavara innuttaasut suliassami tassani isuma-siorneqartarnissaat aalajangiisuulluinnartumik uannut pingaaruteqarmat. Isummersorne-rit tamaasa tusarnaassavagut sammisarlu pillugu paasisaqarluarnissatsinnut piffissaqar-luartaqarpugut, aammalu aalajangiiniapallannerit atussanngilavut. Taamaattumik apeqqut taanna pillugu inaarutaasumik aalajangiinissamut paasisaqarluarsimaneq tunngavigineqassaaq, naggataatigullu kinaassusersiunngitsumik inuiaqatigiinnilu eqqarsaa-tigisassat tunngavigalugit pisariaqarluni.

Inussiarnersumik inuulluaqqusillunga
Inuussutissarsiornermut Aatsitassanullu Naalakkersuisoq



Ove Karl Berthelsen

Ilanngussaq 1: Ulloq 22. marts 2011 tikillugu uranimut suliaasaqarfimmi paasit-siniaanerni ingerlatat.

Ukioq	Qaammat	Ingerlataq
2011	Marts	KNR-imi urani pillugu TV-ikkut oqallinneq , tassani politikkerit, tapersersuisut akerliusullu urani pillugu oqallillutik aammalu innuttaasut apeqquteqarnissamut periarfissaqartinneqarlutik.
2011	Marts	TV-ikkut aallakaatitassiap aallakaateqqinneqarnera, tassani immikkut ilisimasallit arlaannaannulluunniit attuumassuteqanngitsut, aatsitassarsiornermik ingerlatsinerup inuiaqatigiinnut tunngasortai avatangiisinullu sunniuteqarnissai saqqummiullugit. Aallakaatitassiami kattuffiit innuttaasullu assigiinngitsut peqataatinneqartut uranimik paaanermut illersuinerminnik akerliunerminnullu oqaaseqarnissamut periarfissinneqarput.
2010	December	Canadamut paasisassarsiorluni angalaneq pillugu angalanermut nalunaarusiaq . Angalanermut nalunaarusiaq uranimik paaanermut tunngatillugu apeqqutit kalaallinit angalaqatigiinnit apeqqutigineqartut aammalu Canadami oqartussaasunit kattuffinnillu angalaqatigiit ataatsimeeqatigisaannit akissuteqaatigineqartut imaqarniliornerannik imaqarpoq. Nalunaarusiaq pissarsiarineqarsinnaavoq uani www.nanoq.gl .
2010	September	Canadami naalagaaffiup ilaani uranimik paaanermik ingerlatsiviusumit ilisimasalik misilittakkanillu pissarsiaqarnissaq siunertaralugu Canadamut paasisassarsiorluni angalaneq . Naalakkersuisut Inuussutissarsiornermut Avatangiisinullu Ataatsimiititaliami ilaasortat, Kommune Kujallermit politikkerit/atorfilittat attuumassuteqartut aamma Aatsitassanut Ikummatissanullu Pisor-taqarfik qaaqqusimavaat.
2010	September	TV-ikkut aallakaatitassiaq , tassani immikkut ilisimasallit arlaannaannulluunniit attuumassuteqanngitsut, aatsitassarsiornermik ingerlatsinerup inuiaqatigiinnut tunngasortai avatangiisinullu sunniuteqarnissai saqqummiullugit. Aallakaatitassiami kattuffiit innuttaasullu assigiinngitsut peqataatinneqartut uranimik paaanermut illersuinerminnik akerliunerminnullu oqaaseqarnissamut periarfissinneqarput.
2010	August	Urani pillugu quppersagaq GEUS-imit aamma DMU-imit aammalu immikkut ilisimasalinnit toqqartukkanit ilaatigut RISØ-imeersunit suliarineqarpoq. Quppersakkami pissutsit aatsitassanik misissuinermut/paaanermut, isumannaallisaanermut peqqinnissamullu il.il. tunngassuteqartut allaaserineqarput. Quppersagaq kommuninut, illoqarfinnut nassiussuunneqarpoq aammalu pissarsiarineqarsinnaalluni uani www.nanoq.gl .
2010	Juni	Kujataani inuussutissarsiorneq sammillugu angalaneq , tassani pisortani oqartussaasut, sullissiviit suliffeqarfiillu ataatsimeeqatigineqarput. Kujataani angalanermi siunertaavoq suliasaqarfimmi soqutigisaqartut nunap ilaani tassani inuussutissarsiornermi periarfissanik nukittorsaanissamut periarfissat pillugit oqaloqatigineqarnissaat.
2009	September	GME peqatigalugu Kuannersuarnut takusaaneq .
2009	September	Uran pillugu Narsami innuttaasunik ataatsimiititsineq .